

Nukissiuutit ataavartut, soorlu erngup nukinganik nukissiorfeqqat, anorisaatit seqinermillu nukissiorfiit pilersinneqartarnissaannut nunaqarfiit suliffeqarfiillu ilanngullugit aningaasaliiffiqarsinnaangorlugit, savaatilinnut ESU-mik aqqissuussaq ilassuteqarfigeqqullugu Naalackersuisut peqquneqarnissaannik Inatsisartut aalajangiiffigisassaattut siunnersuut.

Akissuteqaat

(Aalisarnermut, Piniarnermut Nunalerinermullu Naalackersuisoq)

Siullermeerneqarnera

Siullermik Siumut gruppianut siunnersuummik matuminnga saqqummiussinerannut qujassuteqaqqaassaanga.

Aallaqqaasiutigalugu erseqqissaatigeqqaassavara Naalackersuisut nunaateqarnermik inuussutissarsiuteqarnermut atatillugu kissaatigimmassuk, uuliamik pinngitsuuisinnaanginnermit pituttorsimasoqarunnaassasoq. Tamatumunnga peqqutit amerlapput - ilaatigut nunap iluani aamma nunarsuarmi inuiaqatigiit CO₂-imik aniatitsinerup annikillisinnissaanut iliuutsit annertusineqarnissaat soqutigisaraat. Tamatuma saniatigut taama iliuuseqarnerup pilersitsinermut aamma ingerlatsinermut aningaasartuutunik annikillisaataassaaq.

Taamaammat siunissaq ungasinnerusoq isigalugu sapinngisamik taamatut pinngitsuuisinnaanginnermit avissaarnissamut periarfissatsialattut nalilerparput aamma tamatumunnga taarsiullugu avatangiisitsinni nukissiuutissatut periarfissaasinnaasut atorneqarsinnaammata.

Inuussutissarsiutunik tapersiisarnermut aqqissuussineq ullumikkut ima aqqissugaavoq taamaallaat nunaateqarnermik inuussutissarsiuteqartunut sammitinneqarluni, aamma aningaasaliissutit ilaatigut atugassangortinneqartarlutik kalaallit nunaanni inuussutissanik nammineq pilersorsinnaanissatsinut naggataatigut iluaqutaasussamik.

Tassunga atatillugu erseqqissaatigerusuppara, inatsisitigut periarfissaasuni nunaateqarnermik inuussutissarsiuteqarnermut inuussutissarsiutunik tapersiisarnermut aqqissuussinermi ataavartumik nukissiuutunik pilersitsiniarnermut tapersiisinnaaneq aporfissaqartinneqanngimmat.

Taakku saniatigut 2009-imut aningaasanut inatsimmi tunngavissiisoqarpoq savaateqarfinnut atasumik erngup nukinganik nukissiuuteeqqanik pilersitsiniarnermi taarsigassarsiat 90%-ii angullugit Naalackersuisut qularnaveeqqusiinnaanissaannut. Nunaateqarneq pillugu inuussutissarsiuteqarnerup siuarsarneqarnissaanut inatsimmut siunnersuuteqarnikkut (UKA 2009/96), aammattaaq qularnaveeqqusiinissamut aqqissuussat annertusineqarsinnaaneratigut erngup nukinganik nukissiuuteeqqat saniatigut nukissiuutit allat, tassalu anorisaatinit aamma seqernup qinngorneranit nukissiuutit ammaanneqarput.

Taamaattorli aalajangiiffigisassatut siunnersuummi ersersinneqartutut, nunaqarfiit aamma suliffeqarfiit aqqissuussami pineqartuni ilanngunneqarsimanatik.

Qularutiginngivillugu oqaatigisinnaasoraara inuussutissarsiutunik tapersiisarnermut aqqissuussinernut pingaarnerusutigut killiliussat ullumikkutut itsillugit naammaginartuusut, aqqissuussineq nunaateqarnermik inuussutissarsiuteqarnermut sammitinneqarmata.

Taamaammat inuussutissarsiutunik tapersiisarnermut aqqissuussineq pillugu inatsisip atuuttuusup allangortinnissaa tunngavissaqanngilaq, akerlianilli soorlu siunnerfigineqartoq, nunaateqarnermut inuussutissarsiuteqartut periarfissamik tamatumunnga atuinissaannik siuarsaasoqassasoq.

Aaqqissuussinerup inuussutissarsiutinut sammitinneqarnera peqqutigalugu Naalakkersuisut siunertarisamut naleqqulluartsorinngilaat nunaqarfiit aamma suliffeqarfiit aaqqissuussamut matumunnga ilanngunneqarnissaat. Siullertut oqartussaaffiit pineqartut suliaqarfinnut allanut attuumasuupput aappaattullu aaqqissuussamik annertusaaneq aallartisassallugu illersorsinnaasorinngilara maannamut aaqqissuussineq nukissiuutinik ataavartunik pilersitsinernut tamakkiisumik atorneqanngereertilugu.

Malugineqassaaq suliniutit/pilersaarutit taakku soorunalimi piffissaq qanittoq aamma ungasinneru-soq isigalugu pinngitsooratik imminut akilersinnaassammata.

Inuussutissarsiornermut Aatsitassarsiornermullu Naalakkersuisoqarfiup ataani suliffeqarniffinnut periarfissaqarpoq systeminut aamma atortulersuutinut ineriartortitsinernut – taakkununnga ilanngulugit ataavartumik nukissiuutinik allanik atuilernissamut pilersaarutinut aningaasaliisoqarnissaanut periarfissaqarpoq.

Qulaani taaneqartut tunngavigalugit Naalakkersuisut nalilerpaat, inuussutissarsiutinik tapersiisarnermik aaqqissuussinerup annertusaqqinnissaanut pisariaqartitsisoqanngitsoq.

Taamatut oqaaseqarlunga Naalakkersuisut sinnerlugit aalajangiiffigisassatut siunnersuutip itigartinneqarnissaa innersuutigissavara.